

## **Hari Kraf Kebangsaan 2019, Sambutan Kraf Berprestij Dinanti Semua**

Bagi penggiat dan pencinta seni kraf tangan khazanah negara, acara tahunan berprestij ini adalah yang terpalang dinanti-nantikan setiap tahun.

Memasuki edisi ke-17 pada tahun ini, penganjuran Hari Kraf Kebangsaan (HKK) sememangnya sukses dan cemerlang dalam menghimpunkan sejumlah besar bilangan penggiat seni kraf dari seluruh negara.

Rakyat Malaysia yang gemarkan elemen estetika seni dan budaya terhadap barangan kraf yang telah lama wujud di negara kita, juga menunjukkan jumlah peningkatan kehadiran yang ketara serta memberangsangkan hampir saban tahun sepanjang HKK berlangsung.

Kedua-dua pencapaian inilah yang mendorong Kraftangan Malaysia untuk meneruskan legasi HKK ke tahap yang lebih baik, khususnya pada tahun 2019 dengan keterlibatan 500 orang usahawan sepanjang HKK yang dijadualkan bermula 28 Februari sehinggalah 31 Mac 2019.

Senantiasa mengetengahkan dan memperkasa industri kraf dengan kepelbagaian program dan aktiviti kraf yang cukup padat, HKK adalah medan bagi pengunjung serta pelancong tempatan mahupun luar negara untuk belajar sambil mendekati keunikan budaya Malaysia yang mempunyai nilai dan keistimewaannya tersendiri.

Kemeriahan berganda sudah tentu dapat dirasakan dengan pengisian acara yang memberikan pengalaman yang berlainan antaranya seperti pameran, demonstrasi kraf serta jualan makanan tradisi Malaysia.

Malaysia yang terkenal sebagai salah sebuah negara ‘syurga makanan’ di peringkat global, terpalang jelas dapat digambarkan menerusi sesi demonstrasi masakan ini yang datangnya dari timur ke barat Semenanjung Malaysia, termasuklah juga dari Borneo.

Pameran yang bakal berlangsung akan membariskan pempamer mengikut latar belakang yang telah diklasifikasikan kepada kategori tertentu seperti Produk Kraf Komunitiku, Produk Baru, Teknologi Kraf, Institut Kraf Negara (IKN) dan juga Kraf Warisan.

Atur cara persembahan kesenian yang dipanggil ‘Craftainment’ juga mampu menjadi tarikan utama pengunjung dengan alunan muzik tradisional dan kontemporari daripada pelbagai kumpulan persembahan termasuklah Gendang Malaysia, Dikir Barat dan Buskers.

Slot perkongsian ilmu juga tidak ketinggalan disediakan untuk para pengunjung timba serba sedikit pengetahuan asas tentang apa yang mereka lihat atau minati.

Sesi yang dipanggil ‘Bicara Kraf’ ini juga merangkumi tips yang menjurus kepada perbincangan, cerita kejayaan, info pasaran, kewangan dan juga asas perniagaan dan keusahawanan.

Pendedahan kepada pendidikan dan interaktif kraf juga menarik untuk pengunjung berbilang kaum di Malaysia mengenali dengan lebih dekat lagi bagaimana sesuatu pembuatan kraf itu dibuat, dan mencuba sendiri di HKK nanti.

Sesi interaktif pula membawa mereka yang kluatir dan ingin mencungkil kebolehan bermain permainan masyarakat Melayu pada zaman dahulu terutamanya di kalangan kerabat diraja dan rakyat jelata, seperti gasing, congkak, sepak raga dan memanah.

Komitmen yang tidak berbelah bahagi oleh Kraftangan Malaysia serta barisan pendokong institusi dan kakitangan yang terlibat khususnya sebelum, semasa sehinggalah kepada penutup HKK 2019 kali ini tentunya menjadi kunci serta kayu pengukur kepada sebuah lagi cerita sukses yang boleh dibanggakan.

Hadirkan diri ke Kompleks Kraf Kuala Lumpur untuk sama-sama merasalkan kemeriahan ini, dan terus juga menyokong Festival Kraf yang turut berjalan serentak di beberapa lokasi hotel dan pusat membeli-belah utama tanah air.

Jom sokong produk kraf tempatan! Siapa lagi kalau bukan kita, rakyat Malaysia sendiri!

Semoga berjumpa kita nanti di HKK 2019!